

十七史商榷

十七史商榷卷七十六

東吳王鳴盛述

新舊唐書八

逮壞人廬舍

舊昭宗紀大順二年張濬等兵敗逮壞人廬舍逮當作乃原本誤同

景福元年疑

景福元年太原兵攻鎮州王鎔告難於幽州李匡威率衆赴之時太原之衆軍於常山鎮易定之衆軍堅固鎮燕趙之卒分拒之此節多可疑原本同

李匡籌赴關

乾寧元年十二月李匡籌南奔赴關當作闕原本誤同

羅平

二年三月浙東節度使董昌僭號稱羅平國羅平原本誤作平羅此正之

充鄆

三年羅宏信南結于梁與太原絕充鄆已至俱陷充鄆上下必有脫文原本同

徹東北而旋

光化二年白氣竟天如練自西南徹東北而旋有燕
卒之敗旋屬下讀其上當有脫支原本亦脫或以旋
絕句非

新書殺某之例

殺無罪則書其官殺某人而其人罪不至死則不書
官罪當殺則曰某人伏誅此新書例也然如昭紀景
福二年以杜讓能之忠而去其官但書殺其下又云
及戶部侍郎杜宏徽何以宏徽官讓能不官乎又如
天復三年正月戊申殺左右神策軍護軍中尉韓全
誨等全誨之死有罪乎無罪乎若云有罪滔天逆賊

朱全忠與奸臣崔允比而刦帝殺之以孤帝之勢耳不可以有罪而去其官也若云無罪以宦寺刦遷天子其罪莫大焉不可以爲無罪而存其官也所云例者不將窮而遁乎不據事直書以著其實而舞文出入強立多例高下其手故多所抵牾

李茂貞乞罷尚書令

舊紀天復三年五月制鳳翔隴右四鎮北庭行軍彰義軍節度涇原渭武觀察處置押蕃落等使開府儀同三司守尚書令兼侍中鳳翔尹上柱國秦王李茂貞可檢校太師守中書令初茂貞凌弱王室朝廷姑

息加尙書令及是全忠方守太尉茂貞懼乞罷尙書
令故也案鳳翔云云者使職也開府云云散官也曰
守曰兼攝銜也鳳翔尹本官也上柱國勲也秦王爵
也上文以廻天再造竭忠守正功臣宣武宣義天平
護國等軍節度使汴宋亳輝河中晉絳慈隰鄭滑潁
鄆齊曹等州觀察處置等使太清宮修葺宮闈制置
度支解縣池場等使開府儀同三司檢校太師守中
書令河中尹汴滑鄆等州刺史上柱國梁王食邑九
千戶食實封六百戶朱全忠可守太尉中書令充諸
道兵馬副元帥進邑三千戶此銜比茂貞多功臣號

一條曰廻天云云是也宣武節度治汴州宣義節度
卽義成治滑州天平節度治鄆州護國節度治河中府

府稱尹州稱刺史全忠時鎮汴州其三鎮蓋遙領也
檢校非守而亦守意也又多封邑者以其進邑而及
之於茂貞則略之也前於順宗紀論尚書省不如中
書門下兩省今茂貞畏朱全忠乞罷尚書令而守中
書令則中書不如尚書者論其品秩尚書令正二品
而門下之長官侍中中書之長官中書令皆正三品
也見唐六典若論其實侍中中書令在唐方爲真宰
相餘以他官參掌者無定員但加同中書門下三品

及平章事

武后爲同鳳閣鸞臺平章事中書

知政事參知機

務參與政事及平章軍國重事之名者並爲宰相初不論其品秩之高卑也說見通典晉荀勗守中書監侍中及遷尙書令人有賀者怒曰奪我鳳皇池何賀焉可見尙書不及兩省自古爲然通典又云舊制宰相當於門下省議事謂之政事堂至永淳三年中書令裴炎以中書執政事筆遂移政事堂在中書省開元十一年張說奏改政事堂爲中書門下其政事印亦改爲中書門下之印可見兩省實政本非尙書比也但太宗爲秦王時曾爲尙書令其後人臣莫敢當

故龍朔中廢令不置但有僕射郭子儀以功高拜亦

讓不受此則茂貞之所以懼而辭耳

僕射必同中書門下平章事方爲宰相則僕射非宰相也但僕射無有不兼者

昭紀改元書法

舊紀不書改元於正月每仍其故號及至是月改元之下又不便提行起故於其下文則正月遂直書二年使新改之元混入散文之內閱者一舉目而但見二年不見元年如此者甚多至昭宗紀改元書法則與他紀異光化元年八月改元而正月卽書之不沿上書乾寧六年天復元年四月改元而正月卽書之

不沿上書光化四年天祐元年閏四月改元而正月
卽書之不沿上書天復四年此則是也一書中體例
參錯有得有失如此

三懼播越

天祐元年遷都洛陽制曰朕十載以來三懼播越案
三懼播越謂乾寧二年邠寧王行瑜鳳翔李茂貞華
州韓建三鎮舉兵犯闕李克用討之行瑜弟行約茂
貞子繼鵬作亂帝出幸石門鎮又三年茂貞再舉兵
犯闕帝出幸華州天復元年崔允密召朱全忠迎駕
宦官韓全誨等刦帝出幸鳳翔

盧繼

六月金紫光祿大夫太子少傅盧繼可太子太保致仕原本作盧紹後卷哀帝紀首書太子太保盧紹卒从紹爲正

文武僖哀皆不書立后

邵經邦曰新舊唐書本紀文武僖三朝皆不書立后而傳中亦逸其姓氏至哀帝年十七被弑自應有后而史皆失傳疎漏如此愚謂文武僖誠疎漏若哀帝以童孺寄命賊臣之手十五被篡十七被弑豈能備禮立后乎

內職

舊袁帝紀天祐二年三月勅翰林學士戶部侍郎楊注是宰臣楊涉親弟兄旣秉於樞衡弟故難居省密可守本官罷內職本官謂戶部侍郎內職謂翰林學士說詳前順宗新紀不見王叔文一條五代劉昫傳唐莊宗拜太常博士以爲翰林學士明宗遷兵部侍郎居職何氏焯曰職上疑有內字何說甚確唐以翰林學士爲內職也舊杜悰傳云元和中翰林學士獨孤郁權德興之女婿時德興作相郁避嫌辭內職上頗重學士許之郁及之孫新書附及傳後亦載此事

正與哀紀事相同

山陵之榮

四月侍御史李光庭等賜章服並以奉山陵之榮也
榮當作勞原本誤同

定錢貫陌勅有脫

丙辰勅准向來事例每貫抽除外以八百五十文爲
貫每陌八十五文如聞坊市之中多以八十爲陌更
有除折頓爽舊規付河南府市肆交易並以八十五
文爲陌不得更有改移此條事例下必有脫文原本
亦脫

臘面茶

六月勅福建供進臘面茶臘當作蠟原本誤同

助効

七月全忠進助効禮錢三萬貫効當作郊原本誤同
助郊者謂助郊天之費也

蘇楷駁昭宗諡

前昭紀末於帝爲全忠弑後云羣臣上諡曰聖穆景
文孝皇帝廟號昭宗至哀紀則云天祐二年十月甲
午起居郎蘇楷駁昭宗諡號曰昭宗皇帝否運莫興
至理猶鬱闔暨猖狂受幽辱於東內嬪嬌悖亂罹天

關於中闈有司先定謚曰聖穆景文孝皇帝廟號昭宗敢言溢美似異直書云云楷禮部尙書循之子凡劣無藝乾寧二年應進士登第後物論以爲濫昭宗命翰林學士陸扆祕書監馮渥覆試黜落永不許入舉場楷負愧銜怨至是與起居郎羅袞起居舍人盧鼎連署駁議楷目不知書其文羅袞作也時政出賊臣太常卿張廷範改謚曰恭靈莊閔孝皇帝廟號曰襄宗全忠自楷駁謚後深鄙之旣傳代後循楷父子皆斥逐不令在朝丁未所司改題昭宗神主輟朝一日攷蒲陽黃御史集唐莆田黃滔著裔孫處權汝猷

蒐輯刻于宋淳熙四年集後又附別錄一卷內采唐昭宗實錄一段備詳覆試貢士黜落蘇楷事舊書昭哀兩紀叙事繁瑣全錄詔令乃覆試黜落事僅於哀紀追述且甚略貢士覆試乃稀見之事舊紀既不避猥冗何不盡入之但昭宗實錄宋敏求所補或劉昫訪求未得其詳故無從采獲耳實錄久亾而偶留此一段於此今全載其文於左方俾鄙陋悖惡小人情狀千載如見鑄鼎象物無所逃隱非讀史者之一快

邪 列位則三年平未臻至化今大朝方興文物須擇賢良冀於僉選之間以觀廊廟之器今年新及第進士張貽

其程考師道後歲符君韶學七于正直十宣士委憲等
其實定度已浸升鄉之臨殿士言募蕘理皆爲韻良弓獻問賦以太宗所問不狀乞落及
藝爰於經史自擇篇題今則比南郭召進文者聞之前書崔一已教且名勒渥宣咸爲木賦下分不第進候
其度必慮士遷鵠賢藝海所試戶部令至九月日以募蕘字輪次各雙工相入落及
多披於集翼諸才人夢賜知午後一誥陸良刻進納丁酉物用入人落及
張喬之列永言其半後必用寐衣制立英一誥陸良刻進納丁酉物用入人落及
莫致精研朕是以虎如典庶色巖等已監丁酉物用入人落及
篇題今則比南郭召進昨未近詞於野已監丁酉物用入人落及
果觀合所之茲然每相自雲林詩詢不曲二至進候

在周士其奏渥其圖凝況詩令李井賦涓藝理黜分
其睿明才伏銀進率爵我賦落樞盧義精昭其一
趙鑒試則以器士朕秩至最下李途等十等慕
觀盡殿趨文分張明已公下許等五人用白本體物
文叶庭覽者設其恩崇難不後再舉人振沈崧意其能曲
等至題者目多科落等五人並與之辭彩無媿
二公升盡實風下二伊殊進式其崔穎詩及且曉盡緣情之妙
四黜取在化舉是人委司吾所取甚得其張胎其趙韻
人而於研並名書門士落曾杜承昭鄭稼等四人所試詩優
望德典精繫仍賜司甚得其張胎其趙韻
准勸頗頗蘇賦第躋異級等十韻既研
處行詠澄此下之不學業敢竊科人所試詩優
分取用汰則匹處行柄且令再舉人稍次光
崔捨昨儒中分勅且宣道門陸分奏選其科人所試詩優
凝而其者雅書賜處乖慎選其科人所試詩優
商憲工宣道門陸分奏選其科人所試詩優
量章拙召長下嚴奏選其科人所試詩優
別斯果貢非覆馮來之崔名人且序人詩黃辭義

狀奏聞丁未勅國家文學之科以革隋弊歲登俊委之春官蓋欲華實相符爲第一用近浸訛謬虛聲相高朕所以思得貞正之儒以掌其事而聞刑部尙書知貢舉崔凝百行有常中立無黨學窺典奧文贍菁英洎遍踐清華多歷年數累更顯重積爲休聲遂殿其憲綱任之文柄宜求精當稍異平常朕昨者以聽政之餘偶思觀閱臨軒比試冀盡其才及覽成文頗多蕪穎豈宜假我公器成彼私榮旣觀一一之吹盡乏彬彬之美且乖朕志宜示朝章尙遵含垢之恩俾就專城之任勉加自省勿謂無恩可貶合州刺史此下又注云廣撫言同又云仍聽發遣

四鎮

三年正月全忠以四鎮之師七萬屯深州樂城四鎮謂宣武宣義天平護國五代史全忠卽位其兄全昱謂曰汝從黃巢爲盜天子用汝爲四鎮節度使

兩鎮

制曰錢鏐總臨兩鎮制撫三吳兩鎮謂鎮海鎮東

哀帝謚號

天祐四年三月唐禪位於梁梁改元開平而太原李克用幽州劉仁恭鳳翔李茂貞西川王建猶稱天祐故舊紀云天祐五年二月二十一日帝爲全忠所害時年十七仍謚曰哀皇帝以王禮葬於濟陰縣之定陶鄉中興之初方備禮改卜遇國喪而止明宗時就故陵置園邑有司請謚曰昭宣光烈孝皇帝廟號景宗中書覆奏少帝行事不合稱宗存謚而已知禮者

亦以宣景之謚非宜今只取本謚載之於紀案自漢

以下廟號謚法皆各一字而已

推東晉蕭梁北魏唐北齊有兩字謚

始累數字爲謚

說見前

若亡國之君或無謚但云少帝

末帝卽有不過一字豈宜累數字爲謚且稱宗與守

文者同乎又父廟號爲昭子謚又冠以昭亦無理後

唐明宗亦亂世故爾但朱溫之惡亘古所無與其用

溫所謚寧從後唐矣劉昫旣稱後唐爲中興乃不用

其謚何哉新紀及通鑑皆用後唐所改蓋有見於此

綱目省去三字曰昭宣帝以免累墜亦通

新書日錄仍稱哀皇

帝亦非又紀末旣書後唐改謚而又載其陵名曰陵曰溫陵此亦足以補舊紀所不足

中興

劉昫稱後唐爲中興者考五代襍傳昫本仕後唐莊宗爲翰林學士明宗拜中書侍郎兼刑部尙書同中書門下平章事廢帝遷吏部尙書門下侍郎監修國史但後則終於石晉耳薛居正舊史略同何氏焯曰監修國史卽唐書也何說確甚宋板舊唐書首卷列銜監修國史推誠守節保運功臣特進守司空兼門下侍郎同中書門下平章事上柱國譙國公食邑五千戶食實封四百戶臣劉昫等奉勅修低二格寫起勅字提行頂格寫第二卷以下止書劉昫等修四字無列銜

聞人詮原本猶仍宋板不改惟勅字空一格不頃格耳朱邪氏雖出沙陀唐已賜姓編之屬籍莊宗自以繼唐立其祖廟昫修史本在後唐此所以稱中興也王鎔鄭從讜劉鄴張濬傳各有中興之語見顧氏筆記而元宗紀末史臣論稱爲我開元說詳後又經籍志叙首稱我朝此皆以唐爲本朝並非因仍唐代史官之筆也文氏徵明目擊宋板列銜可以了然乃作序謂五代史昫傳中不載其修唐書事疏矣

舊劉武周傳附苑君璋傳云君璋執我行人送於哭厥又高祖太穆皇后竇氏傳云父毅畫二孔雀約中

目者許之高祖兩發各中毅悅遂歸於我帝又李吉甫傳云父栖筠國史有傳不言自有傳而言國史有傳者劉昫以唐爲本朝故也

甲子多誤

史家紀事所書甲子舛誤最多無論新舊兩書往往不合卽一書之中紀傳亦每互異予旣未通歷筭不能以歷法推之今觀哀帝舊紀書事最詳殆欲逐日有事空者無幾試隨意取天祐二年四五兩月攷之四月己丑朔其紀事有壬辰癸巳丙午乙未辛丑壬寅癸卯甲辰丁未辛亥壬子丙辰戊午五月己未朔

其紀事有壬戌乙酉丙寅丁卯己巳庚午壬申甲戌乙亥丙子丁丑戊寅庚辰辛巳壬午甲申丙戌其下文卽接六月戊子朔然則四月丙午當爲甲午是初六日五月乙酉當爲乙丑是初七日四月月大戊午是晦五月月小丙戌是晦矣原本誤並同或本自誤或因傳鈔而誤書經三寫烏焉成馬史文繁重學者罕窺况肯校其誤乎宜乎仍訛踵謬如此

徧觀舊書各帝紀惟日食書朔其餘月朔日無事則不書者居多獨昭宗哀帝二紀皆書朔而昭宗間有闕者體例亦參錯

昭哀二紀獨詳

邵經邦曰舊唐帝紀徒侈官銜多至三數行頗類文
移其昭宗哀帝故欲敷衍成帙不顧體裁予謂昭紀
已極煩冗比他紀不同而哀紀之煩冗又倍於昭紀
其猥瑣鄙屑較之元人所修宋史明人所修元史而
逾甚矣邵謂其欲敷衍成帙誠然然而有可爲劉昫
解者宣懿僖昭哀五朝皆無實錄說見前既無實錄其
事蹟易致遺失而昫時相去近比宋敏求傳聞更確
纂修者偶爾訪求而得其詳惟恐泯沒故遂不憚多
載之與此所載皆是實事凡所貴乎史者但欲使善

惡事迹炳著於天下後世而已他奚恤焉今觀此二
紀見亂賊一輩之姦兇狡逆歷歷如繪照膽然犀情
狀畢露使千載下可以考見亦何必恨其太詳邪世
間浮華無實文字災黎禍棗充棟汗牛何獨於紀載
實事必吝此勞邪至於詔令制勅備載幾欲隻字無
遺遙想一時附和小人欺天負地掉弄筆墨誣善醜
正之詞喪心滅良之語賴史家詳述之又得聞人詮
等搜獲於旣亡之後而重刻之其功大矣新書於舊
紀奮然塗抹僅存無幾若哀紀舊約一萬三千字而
新約只千字自謂簡嚴實則篡弑惡迹皆不見矣使

新書存而舊書竟亾讀史者能無遺憾乎

朱全忠以姚洎爲上水船以其當制遲鈍別見
書官必書其全銜元修宋史亦如此於史法誠覺非
宜然今日觀之正可以考唐宋官制亦不恨其太詳
也自不通古今無學無識之人觀之若者本職若者
兼官若者特賜之名若者虛加之號與夫遙領寄祿
檢校裏行階勲爵秩食邑章服一槩茫然不辨亦無
怪乎其惡繁而好簡矣

尊號謚法廟號陵名

唐諸帝有生前所上之尊號如舊元宗紀開元二十

七年二月加尊號開元聖文神武皇帝又肅宗奉上
皇尊號曰太上至道聖皇帝是也有崩後所上之尊
號如上元二年四月上皇崩羣臣上謚曰至道大聖
大明孝皇帝是也此稱爲謚而其餘如高祖則云貞
觀九年五月高祖崩羣臣上謚曰大武皇帝高宗上
元元年八月改上尊號曰神堯皇帝天寶十三年二
月上尊號曰神堯大聖大光孝皇帝太宗則云貞觀
二十三年五月上崩百寮上謚曰文皇帝上元元年
改上尊號曰文武聖皇帝天寶十三載改上尊號爲
文武大聖大廣孝皇帝凡此之類皆或稱謚或稱尊

號者蓋生上尊號固起於唐前世未有卽歿而上謚
前世亦用一字而已無連累數字者若至道大聖皆
不得爲謚故云尊號也至於廟號則古者祖有功宗
有德以其功德之盛謚不足盡之故又追尊爲祖宗
而加以美名其廟則世祀不祧也有功者必是開創
或中興如漢光武始足當之有德則守文承統太抵
有功必兼有德而有德未必兼功故有此別然稱宗
之濫自南北朝已然至唐乃無帝不宗卽順之短促
敬之昏狂且遇弑慙僖之惑亂昭之失國皆稱之此
其異也

舊紀於每一帝崩後先書其年若干次書其當時所上之謚法尊號次書其廟號次書其葬期陵名又其次則舉後代所追加追改之謚盡書之而於後一帝紀中又書葬某帝於某陵惟此似可省餘則明析詳備最爲得法宜悉仍之新紀一意刪削殊多欠妥而又體例參錯岐誤俱不可解如高祖紀崩年謚法廟號改謚增謚皆具惟無葬某陵至太宗則有崩年謚法改謚增謚獨無廟號高宗中宗睿宗與太宗同元宗則謚法廟號葬期陵名俱刪肅宗代宗德宗與元宗同至順宗忽又具書崩年謚法增謚惟無廟號與

太宗同憲宗與順宗同穆宗又盡去謚法廟號葬期
陵名與元宗同敬宗文宗武宗與穆宗同宣宗又具
書崩年謚法加謚惟無廟號葬期陵名與太宗同懿
宗僖宗則又盡去之與元宗同忽詳忽畧毫無定見
彼此不相照顧史法之亂極矣至昭宗亦盡去當時
所上謚法廟號所謂聖穆景文孝皇帝廟號昭宗者
既已隻字不存乃其未忽又云明年起居郎蘇楷請
更謚恭靈莊閔廟號襄宗至後唐同光初復故號謚
何謂更何謂復全無原委使人讀之茫然不解所云
徒恃名重隨筆塗寫不加檢勘猶疏乃至此區區標

題名號睂目所在舛謬百出遑論佗乎其下文哀紀
先書諡哀後書明宗追改則得之觀哀紀愈見昭紀
之非

十七史商榷卷七十六

十七史商榷卷七十七

東吳王鳴盛述

新舊唐書九

貞觀禮

舊禮儀志云太宗踐祚之初中書令房元齡等修改舊禮定吉禮六十一篇賓禮四篇軍禮二十篇嘉禮四十二篇凶禮六篇國恤五篇總一百三十八篇分爲一百卷此所叙列當必無誤新禮樂志所述於凶禮但總言十一卷不分國恤非是又其下文於高宗顯慶禮元宗開元禮皆著卷數與舊志同而於貞觀

禮但言篇數刪去卷數亦非

簿

新禮樂志說皇后親蠶之儀云尙功以桑授蠶母蠶母切之以授婕妤食蠶灑一簿止案毛詩幽風八月萑葦傳云萑葦可以爲曲月令季春說養蠶事云具曲植蘧筐注云曲薄也疏方言云宋魏陳江淮之間謂之曲關西謂之薄然則此字本作薄傳寫誤爲簿說文卷五上竹部局戲也與此無涉乃又轉誤爲簿說文無此字今俗又別造蠶薄之字爲簿說文新附亦無

絳紩

新禮樂志凶禮篇說始舛浴戶之儀云沐巾一浴巾二用絳若紩考說文卷十三上系部紩散絲也八卦切無絳字玉篇亦無而有緒字音髻絲結說文新附亦不收

天文志叙首誤

舊唐書天文志上元宗詔沙門一行造渾天儀鑄銅爲圓天之象上具列宿赤道及用天度數圓上原本誤空一字近本正之原本如此者甚多今不悉出用原本作周近本誤又銅儀漸澁收置集賢院不行復

用原本作不復行用近本誤又今錄游儀制度等著於篇原本此下卽接黃道游儀規尺寸云云頗牽混近本篇下挂空黃道云云提行另起著於篇以上乃敘首以後方逐條分列近本是

面上爲兩界一段誤

面上爲兩界內外爲周天此段似當另起或空一格內外二字原本小字雙行平寫書中如此者多鈔胥落一字上下不可全改則小字補之近本因爲改正俱大字連書其實外乃衍字又說天頂單環云稍南使見日出入令與陽經陰緯相固使當作狹令字當

作之交二字原本誤並同而又於出入下誤空一格
又去南北平各九十一度雖赤道單環云云雖原本
作強是屬上讀又臣今創置此環置於赤道環內上
置當作製原本誤同又尾九星十八度舊去極一百
二十度一云一百四十一度今一百二十四度一云
一百四十一度八字原本小字雙行近本改一百二
十四校本作一百八又南斗六星二十六度舊去極
一百一十六度今一百一十九度一百一十九校本
作一百二十九又須女四星十二度舊去極一百度
今一百一度虛二星十度云云須女一段原本與校

本並無近本增虛上原本有危字又東壁二星九度
云云二星校本作三星又胃三星十四度校本原本
俱無近本增又軍井準經在玉井東南二斗半斗當
作度原本誤同

日晷一段誤

日晷一段內云北方其沒地纔十五度餘南距洛陽
九千八百一十六北方當作北極距洛陽當云九千
八百一十里

六尺九寸

林邑國北極高十七度四分小字注云冬至影在表

北六尺九寸定六尺九寸校本作六寸七分原本誤

同

分野一條誤字

舊天文志下論分野云東盡東萊之地小字注云漢之東萊卽古膠來國古原本作及誤膠來當作膠東原本誤同又東及館陶聊城小字注云自頓丘三城武陽東至聊城三城當作觀城原本誤同又昴畢大梁云云原本誤連上近本改提行又得漢之趙圃廣平距鹿常山原本圖作國距作鉅是又盡漢之南郡小字注云南郡巫縣今在蘄州蘄當作夔原本誤同

又江夏小字注云安鄂縣汚黃五州皆江夏界縣當作斬原本誤同又得漢長沙武陵桂陽零陵郡小字注云零陵今爲道州桂陽今爲柳州道原本誤作首近改正柳當作郴原本誤同又盡鬱林合浦之地小字注云富昭蒙龔繡容白罕八州以西罕當作牢原本誤同

星字一條誤字

星字一條許敬宗曰星字于東北王師問罪高麗將滅之此下原本有徵字近脫又彗見西方天市中五尺漸小向東長行五尺上原有長字下長字原無近

誤脫又誤衍又此段之首原本誤與上文日蝕一段
連近本改正提行

上有黃白冠

上元三年正月建辰月肅宗病是月丙戌上有黃白
冠連成暈上之上原本有月字近本脫

王廷湊

長慶元年七月二十八日鎮州軍亂殺其帥田宏正
王廷湊案王上當有立字原本近本俱脫校本亦無
之

災異標題岐誤

天文志應提行不提行皆經近本改正而武德元年十月壬申朔云云以下一段原本旣標題爲日蝕矣然自武德九年二月二十三日夜云云以下則言星變月蝕居多而原本乃槩系之于日蝕直至唐隆元年六月八日虹蜺竟天而止此下乃復以災異編年四字爲標題題之下空四格又標至德後三字然後再提行書至德元年三月乙酉歲太白熒惑合于東井云云尤爲無理其實日蝕亦是災異原不當分標故近本一槩去之但以災異二字標於日蝕之前極是

唐歷疏不能定朔

新天文志云武太后時月過望不虧者土此豈真武氏陰盛之故邪抑唐人歷法之疏至不能定朔而致然與

五行志多重本紀

舊五行志文多與本紀重出如開成四年六月天下旱蝗食田當作苗上憂與宰臣語與文宗本紀重出又

大歷八年九月大鳥見於武功殿與代宗本紀重出又貞元四年夏汴鄭二州羣鳥皆飛入田緒李納境內貞元八年二月許州人李狗兒持杖上含元殿二

事皆與德宗本紀重出又神龍二年三月洛陽東七
里有水影與中宗本紀重出如此者甚多本紀欲書
災祥則重複自不能免但既有五行志紀中須刪削
歸於至簡而舊書每兩處皆用鱗文此書所以難免
後人譏議

則天遣閻知微事

則天遣尚書閻知微送武延秀立知微爲可汗挾之
入寇案送武延秀之下有使突厥突厥怒則天廢李
氏乃囚延秀十五字原本近本並脫凡脫誤一兩字
者不悉出多者見之又此事亦複本紀此類不能盡

畢

十七史商榷

卷十七

七

十七史商榷卷七十八

東吳王鳴盛述

新舊唐書十

秦地爲四十九郡

舊唐書地理志叙首云秦并天下裂地爲四十九郡原本同愚謂通典一百七十一卷州郡門文與舊書志大略多同此句則作四十郡九字之爲衍文不待言但秦分天下爲三十六郡而此言四十亦不合者何通典班志所列三十六之外又連內史及鄣郡黔中閩中數之是也宋歐陽忞輿地廣記第一卷列秦

四十郡與通典同說見予前漢故郡國一條

舊志與兩漢志互異

凡地理志敘首輒歷敘古初雖屬浮泛可厭要亦不能盡去舊地志敘漢制與班志多同然云漢地南北一萬二千三百六十八里二千班志作三千通典同近本誤原本亦誤敘東漢制與司馬彪續漢志多同然云縣道侯國千一百八十六原本同續漢志無六字通典亦無恐亦衍文據司馬彪說東漢省併甚多則縣之少不足怪

改郡爲州

舊地志云高祖受命改郡爲州太守並稱刺史案唐虞分州三代相沿秦變爲郡遂革州名而漢復稱之以州統郡州大郡小其分封者爲國兼用周秦之制也歷魏晉及南北朝而冀兗等名猶在隋大業三年始改州爲郡置司隸刺史以糾郡守自此以後九州十二州之名不復用矣唐高祖又改郡爲州三代之州兼唐數郡或數十郡之地唐之州與三代之州大異漢之刺史統唐數郡或數十郡之地唐乃以郡守爲刺史時異勢殊其沿革不同如此但舊志惟臚列各州其下說本古某郡而已新唐書地理志則云京

兆府京兆郡云云華州華陰郡云云同州馮翊郡云
云每州必州名郡名並舉之河南則云河南府河南
郡陝州則云陝州陝郡州郡名同者猶必並舉之而
其中亦間有但列州名者故於渭州下特發例云凡
乾元後所置州皆無郡名據此則乾元以前凡州皆
兼郡名也舊志乃但列州名顯係脫漏此舊之不如
新者

新志既言乾元後州無郡名則凡但列州名者皆乾
元後州矣乃復於威州下用小字雙行注云郡闕其
下則云本安樂州初吐谷渾部落自涼州徙于鄯州

又徙於靈州之境咸亨三年以靈州之故鳴沙縣地置州以居之至德後沒吐蕃大中三年收復更名攷肅宗初改元至德後改元乾元而咸亨是高宗號在乾元之前八九十年旣置爲州必有郡名而沒蕃後史失其傳故云郡闕他州當更有類此者而獨注於此以見例

李吉甫元和郡縣志杜佑通典州郡門皆州名郡名並舉可見唐制於改郡爲州之後仍存其故郡名每州輒稱爲某州某郡也佑并仍存古州名欲以見因革大凡吉甫則竟去之因距古已遠省此糾纏二者

各有一義

卽如吾蘇稱蘇州吳郡蘇州者唐制也而
吳郡則自後漢以至南北朝之稱唐稱蘇
州而仍存古名爲吳郡若于職官則爲蘇州刺史不
時隨便言之吳郡太守惟舊韋安石之子疇傳有吳郡太守一
不可爲典要

開元分五十道

舊地志開元二十一年分天下爲五十道每道置採訪使據下文所列乃十五道五十當誤原本誤同通典作十五是也上文貞觀元年分十道關內河南河東河北山南隴右淮南江南劍南嶺南開元以山南江南皆分東西各二添黔中合京畿都畿爲十五又此段之下不應挂空後京畿採訪云云亦不應提行

應運寫

江南東道採訪使理蘇州誤作薊州原本同

十節度異文脫文衍文

安西節度使通典作鎮西北庭節度使防制突騎施
堅昆斬通典作突騎馳施馳字因施而衍至斬下有
啜字則是也此脫耳彼注以堅昆與斬啜並言此注
堅昆斬東北去斬啜千七百里則上斬字又是誤衍
河西節度使注張掖守捉在涼州南二里二里必有
脫原本脫同平盧軍節度使統榆關守捉榆通典作
渝渝本水名从水爲是隴右節度使統臨洮河源白

水安人振威威戎莫門寧塞積石鎮西等九軍按正文及注實十軍而云九原本同恐誤又注安人軍在鄯州界星宿川州西原本同下州疑衍字合州守捉原本作合川是嶺南五府經畧使統桂管容管安南邕管四經畧使安南通典作鎮南注同又邕管入經畧使管兵七百人入字衍原本同七百上通典有千字此脫

四十七使

至德之後中原用兵刺史皆治軍戎遂有防禦團練制置之名要衝大郡皆有節度之類寇盜稍息則易

以觀察之號類當作額原本誤同此下分列諸使凡四十有七內單稱節度使者三十五節度之有軍名者稱其軍名無者但稱其地單稱觀察使者五單稱經畧使者二稱經畧觀察使者一已上皆用小字注明治所及所管之州其東都畿汝防禦觀察使則東都留守兼之潼關防禦鎮國軍使同州防禦長春宮使大同軍防禦使則各刺史領之已上雖有其名但兼攝不特置也其成德軍節度使近本脫德字當從原本添以留守刺史兼領者卽上文所謂刺史治軍戎有防禦等名是也諸使中所列但有防禦不見團

練制置名者省文也寇盜息以觀察易節度之號者
浙江東西道節度使各注或爲觀察使江南西道觀

察使注喪亂後時升爲節度使是而其餘各節度亦
或更有爲觀察未及注者也劍南西川及淮南兩節
度注親王領之者皆遙領不親涖也其真涖者爲副

大使

新百官志云諸王拜
節度使者皆留京師

劍南西川或因元宗嘗幸重之淮南以親王領不詳
其故抑疑親王領節度不止此二處恐此所注尙不

盡

此四十七使但言至德之後非盡至德年中所立也

知者卽如宣武軍節度使注云治汴州管汴宋毫潁
四州攷新書方鎮表宣武軍之名起於德宗建中元
年至德時尙未有此名然建中時此軍猶治宋州其
治汴州則興元元年所徙又在建中之後卽舉此一
條以槩其餘則可知

新王彥威傳至德至元和天下觀察十節度二十九防禦四經

畧三此數又參錯不合存疑

新書百官志於外官之首先列元帥都統此掌征伐
兵罷則省非常設其次則臚列五種一曰節度次曰
觀察次曰團練次曰防禦次曰經畧此則皆統領所
部監司之官也獨不見採訪使新書於地理志以十

五道採訪使所轄敘次各州郡而於此反不見者蓋
此下文注云開元二年設十道按察採訪處置使二
十年曰採訪置處使分十五道天寶末又兼黜陟乾
元元年改曰觀察處置使案舊地志開元二十一年
置十五道採訪使此云二十年者脫一字也彼不言
處置省文此言置處誤倒耳據此則言觀察足該採
訪故不入大字僅見注中也舊志亦先詳列十五道
採訪理所至四十七使中不見採訪固由乾元已改
爲觀察其於職官志則竟不之及通典一百七十二
卷州郡門前旣列十五採訪理所後又述十五部逐

部用小字分注所管之郡雖不言採訪但惟採訪分十五道餘使皆否則此定指採訪無疑分作兩遍敘述極其詳贍而三十二卷職官門州郡都督一條內附及總管節度團練都統等使云分天下州縣爲諸道每道置使治於所部卽採訪防禦等使也亦只不過帶敘一句其所以如此畧之者通典職官門又云至德以來天下多難諸道聚兵增節度使爲二十餘道二十一當作四十方與舊地志四十七使合此等乃傳寫之誤其非節度使者謂之防禦使以採訪使并領之採訪理州縣防禦理軍事初節度與採訪各置一人天寶中始一人兼領之

觀此則知所以畧去採訪之故矣且新百官志雖臚列五種名目其實則觀察團練防禦經畧後已盡歸節度攷其制又須得其情勢曲折方有當於論世之學

外官要領惟採訪節度二使

唐外官要領惟採訪節度二使而已舊志於卷首標題爲十道郡國唐制無國名與漢異此字用來牽混至其所謂十道則關內道一河南道二河東道三河北道四山東道五淮南道六江南道七隴右道八劍南道九嶺南道十也此十道乃貞觀元年所分開元

二十一年又分十五道每道置採訪使山南江南皆
分爲東西二道又添黔中道又以關內道亦分爲二
一爲京畿採訪使治京師城內所管州郡凡六一爲
關內採訪使以京官遙領所管州郡及都護府凡二
十有七河南道亦分爲二一爲都畿採訪使治東都
城內卽今河
南府
所管州郡凡二一爲河南採訪使治汴
州卽今開
封府所管州郡凡二十有八合計共十五道漢
宣帝言與我共治百姓者良二千石指謂太守而縣
令尤爲親民之官然則守令者是守土治民之官之
切要者也而採訪使者則大約爲守土官之領袖故

新唐地志以此分列各州郡至於節度使者通典第
三十二卷職官門謂始於景雲二年以賀拔延嗣爲
河西節度使新書兵志同此不過言其所起耳爾時惟邊

境設此使餘不常置也蓋始名總管繼改都督至景
雲雖創立節度名色而開元十五道採訪十五節度
僅八所置猶少且猶採訪自採訪節度自節度至天
寶乃遂以一人兼領之至德以後增置節度益多矣
以上俱本通典又舊志云至德後要衝大郡皆有節度之額
寇盜稍息則易以觀察之號是至德之節度觀察猶
相間用之也迨至中葉以降而增置節度益多其列

銜往往稱某軍節度某處管內觀察處置等使則觀察但爲節度之兼銜矣且節度無不兼本州刺史則權盡歸於一家而守土之臣幾無復有分其任者矣觀新舊諸列傳及唐人碑版自見至唐末藩鎮無不帶三師三公及同中書門下平章事者而使相幾滿天下則不但合採訪觀察以爲一而已誠極弊也大約盛於開寶成於肅代積重難返遂係一代興衰陳繼儒唐藩鎮指掌編言之頗暢然皆不出新舊書及通典之文

新書表第七卷方鎮表景雲元年第五格河西諸軍

州節度支度營田使此則唐一代節度使之名所由始也而爲節度使人之所始則賀拔延嗣已見上惟陳繼儒指掌編謂節度始於景雲元年以薛訥爲幽州經畧節度大使此與通典及新兵志謂始於賀拔延嗣者稍不同不知所據俟攷

十七史商榷卷七十九

東吳王鳴盛述

新舊唐書十一

天寶十一載地理

舊地志乾符之後天下亂離瓜分豆剖或併或析不可備書今舉天寶十一載地理唐土南北如前漢之盛東則不及西則過之注漢西至燉煌今沙州唐土又至龜茲是西過漢愚謂龜茲上脫至字今以意增向來志地理者皆據最後爲定如漢據元始是舊唐據天寶十一載則以其極盛又於河北道末總結一

句云今記天寶承平之地理焉但今詳考之舊志既據天寶故其例每一州總敘沿革之下卽先云舊領縣若干戶若干口若干其下若天寶領縣有增損則云天寶領縣若干戶若干口若干如無增損則但云戶若干口若干此其例也今其中不合者如涇州舊領縣五其下但有天寶戶口無領縣若干字然數其屬縣實四縣而云五河南府天寶領縣二十六今數屬縣實二十四而云二十六鄭州舊領縣八天寶領縣七今數屬縣實六縣而云七許州舊領縣九天寶領縣七今數屬縣實八縣而云七

此州多出一縣者
因長慶三年又以

鄆城來屬故也

兗州舊領縣八天寶領縣十一今數屬縣實

十縣而云十一青州舊領縣七其下但有天寶戶口無領縣若干字然數其屬縣實八縣而云七相州舊領縣九天寶領縣十一今數屬縣實十縣而云十一魏州舊領縣十三天寶領縣十今數屬縣實九縣而云十邢州舊領縣九其下但有天寶戶口無領縣若干字然數其屬縣實八縣而云九趙州舊領縣九其下但有天寶戶口無領縣若干字然數其屬縣實八縣而云九冀州舊領縣六天寶領縣九今數屬縣實八縣而云九深州舊領縣五天寶領縣四今數屬縣

實八縣而云四滄州舊領縣十天寶領縣十一今數屬縣實九縣而云十一集州舊領縣一天寶領縣二今數屬縣實三縣而云二蓬州舊領縣六天寶領縣七今數屬縣實六縣而云七越州舊領縣五天寶領縣六今數屬縣實七縣而云六婺州舊領縣五天寶領縣六今數屬縣實七縣而云六觀下文浦陽云新置則知此少今領句耳一洪州舊領縣四天寶領縣六今數屬縣實七縣而云六實七縣者有分寧一縣係貞元間分置也應再加今領縣七一句江州舊領縣三其下但有天寶戶口無領縣若干字然數其屬縣實四縣而云三此內有一縣係至德分置故也少今領縣四一句永州

舊領縣三其下但有天寶戶口無領縣若干字然數其屬縣實四縣而云三郴州舊領縣五天寶領縣八今數屬縣實七縣而云八思州舊領縣三其下但有天寶戶口無領縣若干字然數其屬縣實四縣而云三渭州舊領縣四其下但有天寶戶口無領縣若干字然數其屬縣實三縣而云四此道地屬天水郡後漢分武陽置郭縣天授二年改爲武陽縣神龍元年復爲郭縣如此而止所敍沿革殊不明備疑或有他縣省併入此縣者而誤脫落其文耳洮州舊領縣二其下但有天寶戶口無領縣若干字然數其屬縣實一縣而云二劍南道成都府舊領縣十六天寶領縣十今數屬縣實九

縣而云十以上各條或有因數目字傳寫易誤遂致舛錯者或有因天寶以後別有改更而竟不及者或有明著後改之事而業已槩據天寶遂不復言今領縣若干者

惟河南道泗州舊領縣五天寶領縣六而其下又云今領縣三臨淮漣水徐城其虹縣割隸宿州宿預下邳隸徐州又齊州舊領縣八其下言天寶戶口而又云今管縣六併三縣也淄州舊領縣五其下言天寶戶口而又云今管縣四併濟陽入高苑河東道河中府舊領縣五天寶領縣八而其下又云元和領縣十

一又晉州舊領縣七天寶領縣九而其下又云元和
領縣八河北道洺州舊領縣七天寶領縣十而其下
又云今領縣六鎮州舊領縣六天寶領縣九而其下
又云今領縣十一又易州舊領縣五天寶領縣八而
其下又云今領縣六江南東道處州舊領縣四天寶
領縣五而其下又云今縣六江南西道宣州舊領縣
八天寶領縣九而其下又云今縣十虔州舊領縣四
天寶領縣六而其下又云今縣七道州舊領縣三天
寶領縣四而其下又云今領縣五以上各條雖詳畧
不同皆并言後定地理則又非槩據天寶真自亂其

例矣唐有天下三百年天寶未及其半安能遂據爲定自不如新志據天祐爲妥乃舊志亦似有據天祐者如河北道景州歷敘沿革敘至景福言領三縣與現載屬縣正合却不言舊領縣若干天寶領縣若干而其末則云天祐五年領縣六按之數却不合又於弓高下云景州興替不常事在州說中然則領縣六六字誤也景福天祐相連國已將亾未必頻改六字誤無疑矣而體例之亂如此至河南道鄆州有今領縣十一句按之實凡縣而須昌一縣兩處複載豈作史者既誤複載遂於總說中據誤而再誤乎近本已

刪去其複而總說之誤自如也又有河東道絳州舊
領天寶領今領三者皆無按其沿革說至武德四年
而止竟是作史者昏忘遺失一段又如江南東道湖
州舊領縣五又言天寶領縣五隴右道河州舊領縣
三其下文言天寶領縣三劍南道綿州舊領縣九其
下又言天寶領縣九其數皆合此則何事重言之直
是草率具稿不暇淨刪衍字而且又有如江南東道
之福州天寶領縣八數之果然矣但其中有永泰縣
係永泰年分置又有梅青縣云是新置凡他處言新
置者皆謂在天寶後然則此數雖合而八縣之建置

實不盡在天寶之前此又不可解也而且又有如河西道之西州中都督府舊領縣五又言天寶領縣五而按之實四縣此又不可解也而且又有如効南道之翼州舊領縣三天寶領縣二數之實三縣而其中有新置若言今領縣三則反混於舊領矣此又例之窮而遁者唐制糾紛史家本難措筆而舊志疵謬百出實覺不可枚舉

又有効南道閻州舊領縣八戶口云云其下不言天寶却言今領縣

九其數合此下卽接戶口云云此則誤以天寶爲今

領又河北道幽州大都督府舊領縣十

薊幽都廣平潞武清永清安次良鄉昌平寶

九縣然

舊領縣十十當作九此但誤字耳

舊地志郡府戶口數

舊地志開元二十八年戶部計帳凡郡府二百二十九縣千五百七十有三戶八百四十一萬二千八百七十一口四千八百四十四萬三千六百九應受田一千四百四十萬三千八百六十二頃一十三畝此云開元二十八年而通典則云天寶初開元終於二十九年則開元末卽天寶初二說同也郡府數內二百原本與近本同新書通典皆作三百當從之口數內四十四萬原本及新書皆作一十四萬近本傳寫誤田數原本與近本同新書刪去零數一十三畝

四字

唐地分十五道採訪爲正

志唐地理自當如新書以十五道採訪使爲綱排列各州郡方爲得宜知者十五道係開元全盛時所置採訪使正是統轄州郡至要之官前此武德貞觀制尙未定不可爲據固不待言若肅代以下疆域之分割職官之變更朝三暮四棼如亂絲不可爬梳馴致懿僖天下大亂冰碎瓦裂若必欲取最後所定者以爲定則如何紀載恐愈覺煩瑣不成文義矣不得已而析其中故以開元全盛所分爲定實覺斟酌盡善

此其中有三說以全盛之制爲標目則可包括前後事一說也天寶後旣以採訪節度合爲一則言採訪即可該節度二說也每一道中分爲數個節度節度雖分而未嘗不可以十五道名之則新地志所分自屬精當三說也李吉甫所分列與新志同但於每道中又分各鎮耳

舊地志敘首旣知貞觀分十道開元分十五道所列採訪名目治所皆與新志同乃其排列各州郡處則又以十道爲主何也且旣標十道矣而其中山南江南仍分東西劖南則又不分東西進退無據皆非是

若隴右之後添出河西注云此又從隴右道分出不在十道之內此蓋宣宗大中年間收復不得不如此附入又嶺南道分爲五管故其前標明南海節度使領十七州以下分標四管云桂管十五州在廣州西邕管十州在桂府西南容管十州在桂管西南安南府在邕管之西與各道不同此乃不得不如此變通此二條不可以自亂其例譏之舊杜佑傳舊嶺南節度常兼五管經畧使

佑獨不兼五管不屬嶺南自佑始佑爲嶺南節度使德宗在興元時云自佑始則以後皆然此志中不得不分標

天祐

舊地志據天寶十一載地理如京兆府下云舊領縣十八天寶領縣二十三新地志不言據何年則是據最後爲定矣故京兆府下雖列天寶元年戶口數其領縣二十却非天寶乃據最後大約各府各州郡皆然考此府之屬縣比舊少櫟陽盩厔奉先三縣櫟陽在華州華陰郡下奉先在同州馮翊郡下俱注天祐三年來屬盩厔在鳳翔府扶風郡下注天復元年來屬其據最後甚明舊志旣自言唐末亂不可備書故據天寶而新書雖往往有意欲與舊書乖違然漢元始王莽擅命而班氏據之前例可循則天祐賊臣朱

溫所建置正與漢事類新志自可通惟漢戶口亦據元始新志則戶口據天寶建置據天祐爲異太約昭宗之世分離乖隔戶口版籍都無足據史家於此亦有不得已者然則新志之例敘各道疆域則以開元十五道爲正敘戶口則以天寶爲正敘州郡建置沿革則以天祐爲正三者似屬多岐其實乃苦心參酌所宜而定大約新書諸志表多能補舊之缺而新地志尤遠勝於舊地志

赤畿望緊上中下輔雄

隋于州于郡于縣但分上上上中上下中中中中

下下上下中下下九等而已見隋書百官志至唐制
郡縣有赤畿望緊上中下之差又有輔有雄赤有次
赤輔有上輔又有以赤兼上輔者又有稱中下者未
能詳考新志每郡每縣下必詳著之惟爲府者不注
於府下縣下仍有而舊志有此字者甚少不及十之
一全不注則爲遺漏有注有不注則例更亂矣新志
於關內採訪使所屬之渭州下云中和四年置凡乾
元後所置州皆無郡名及其季世所置又不列上中
下之第但言不列上中下不知赤畿等字仍有否未
詳新張九齡傳刺史京輔雄望之郡少擇之新百官

志注云文宗世宰相韋處厚議復置兩輔六雄十望十緊州別駕亦見舊書一百五十九卷處厚本傳兩輔六雄十望十緊名義亦皆未詳李吉甫元和郡縣志王存元豐九域志歐陽忞輿地廣記及宋史第五十八卷至九十卷地理志皆有赤畿等字杜佑通典州郡門樂史太平寰宇記皆無之陸廣微吳地記云蘇州名標十望地號六雄又歐陽先生詹文集第七卷送常熟許少府之任序云始入仕一由縣尉或中或上或緊銓衡評才若地而命之此類亦當時通俗語如元人襍劇猶有赤緊字參尋文理大約似所謂衝繁疲難

每都每縣下既注有此等字樣則其前敍首似應先
揭明乃絕未提及而忽見於每郡縣下亦嫌太突考
之他書俱無見惟宋謝維新合璧事類後集第七十
九卷縣官門知縣唐制縣有六等之差赤畿望緊上
中下京都所治爲赤縣旁邑爲畿縣其餘則以戶口
多少地美惡爲差凡一千五百七十三縣令各一人
國朝建隆元年應天下諸縣除赤畿外有望緊上中
下四千戶爲望三千戶以上爲緊二千戶以上爲上
千戶以上爲中不滿千戶爲中下五百戶以下爲下
六等當作七等不言輔與雄者疑輔卽畿雄卽望緊

也

前代沿革

前代沿革舊志太詳新志惟舉唐之建置於前代盡去之又似太畧

每府州下皆有府

新志於每一府州之下皆有小字注云有府若干此則舊文之所無而新書特增者也案惟畿輔稱府京兆府河南府是也其餘則都護府乃邊境治民之官都督府乃總管之改名今各府州下小字注有府若干與彼諸府絕無干涉此是府兵之制中所立營屯

隊伍名色唐制府兵寓兵於農無事時耕於野_{備上}
者宿衛京師有事則命將以出事解兵散於府將歸
於朝其無事時雖與農無異要必別自爲籍如後代
衛所之制新兵志惜未詳而於地志中猶存其名目
兵志言府兵諸府總曰折衝府凡天下十道置府六
百三十四今地志於京兆郡多至府百三十一者以
其爲京師也河南郡則三十九稍多以其爲陪京也
其餘各州郡至多不過一二十府少至一二府者甚
多然則其爲府兵散隸各州郡平日無事時別立部
籍名色無疑

羈縻州

羈縻州舊志各綴於每道之下殊嫌冗贅新志改爲總聚於後別立一目較爲明淨

廣陵

舊唐地志淮南道揚州大都督府天寶元年爲廣陵郡乾元元年復爲揚州愚考廣陵國見漢志至唐天寶尙沿此稱其來久矣朱先生彝尊文集第三卷謁廣陵侯廟詩序辨枚乘七發八月之望觀濤於廣陵之曲江世疑廣陵國爲今揚州府治然曾子固撰越郡趙公救災記中有廣陵斗門合之伍子之山胥母

之場疑義可析云云又第二十六卷滿江紅錢唐觀
潮詞自注亦引七發又第三十一卷與越辰六書七
發廣陵之曲江卽浙江水經注浙江水流兩山間江
川急濬兼濤水晝夜再來是以枚乘曰海上潮江
水逆流其詮釋最確曾鞏序鑑湖圖有廣陵斗門在
今山陰縣西六十里去浙江不遠而錢唐郭外有廣
陵侯廟今猶存若江都之更名廣陵在元狩三年時
乘已卒不應先見之於文是七發之廣陵非江都明
矣世人以廣陵二字遂誣曲江在揚州可笑也比見
足下榜門書曲江濤字流俗相沿無足怪特不宜誤

自足下云云愚謂先生考證之學世所共推而此一事則其所引在水經注第四十卷漸江水篇最爲有據乃先生得意筆故屢見之但李善注七發於廣陵引漢書地志廣陵國屬吳凌赤岸注引山謙之南徐州記曰京江禹貢北江春秋分朔輒有大濤至江乘北激赤岸尤更迅猛山謙之宋文帝時人酈道元魏末當南之梁末人山在酈前甚遠况酈北人說南水每多誤山南人記南水似更可信朱先生旣無以駁山謙之爲必非乃隱其名而曰世疑云云曰世人遂誣云云曰流俗相沿云云何哉蕭子顯南齊書州郡

志云南兗州鎮廣陵漢故王國有江都浦水刺史每以秋月出海陵觀濤與京口對岸江之壯闊處也子顯齊梁間人亦在廊前而生長南方所言不謬至廣陵之名據吳越春秋夫差時已有非起於元狩且枚乘淮陰人爲吳王郎中正宜就近說觀濤事恐當仍

舊解

李白集第十四卷送友人尋越中山水詩湖清霜鏡曉濤白雪山來八月枚乘筆三吳張翰益此似足證廣陵濤在錢唐朱先生未引但此上文別有送當塗趙少府赴長蘆詩我來揚都市送客廻輕舠因誇吳

太子便覩廣陵濤仙尉趙家玉英風凌四豪維舟至長蘆目送煙雲高王琦注唐有二長蘆一長蘆縣隸河北道滄州一長蘆鎮在淮南道揚州之六合縣南二十五里則此詩仍以廣陵濤在淮南矣

吳曾能改齋漫錄第八卷地理篇因七發有弭節伍子之山卽胥山遂謂曲江在蘇州但蘇州從無廣陵之稱此說夏謬

瓜洲瓜步

新唐地志潤州丹陽郡丹徒注開元二十二年刺史齊澣以州北隔江舟行遠瓜步回遠六十里多風濤

乃於京口埭下直趨渡江二十里開伊婁河二十五里渡揚子立埭歲利百億舟不漂蕩舊唐文苑齊澣傳敘此事云開元二十五年遷潤州刺史充江南東道採訪處置使潤州北界隔吳江至瓜步沙尾紓滙六十里船繞瓜步多爲風濤之所漂損滯乃移其漕路於京口塘下直渡江二十里又開伊婁河二十五里卽達楊子縣自是免漂損之災歲減脚錢數十萬又立伊婁埭官收其課迄今利濟焉案此與新志略同而皆不言是瓜洲其實則瓜洲也蓋自吳夫差開邗溝通江淮此與今瓜洲抵揚州淮安之路不知是

一是二要爲近之然夫差時此道但可運糧不勝戰
艦其用兵爭霸上國仍沿江入海自海溯淮不由邗
溝也

詳尚書後案第三卷

漢志廣陵國江都縣注渠水首受江

北至射陽入湖此卽夫差邗溝然漢時大兵大役亦

必不以此爲渡江之路直至隋大業中大發淮南夫

開邗溝自山陽至揚子入江江淮始大通

亦詳尚書後案第三卷

而汴泗亦通矣白居易詞云汴水流泗水流流到

瓜洲古渡頭是也乾隆元年江南通志第二十卷城
池門云瓜洲城在揚州府南四十五里大江之濱宋
乾道中築又第二十六卷關津門云西津渡在鎮江

府丹徒縣西北九里北與瓜洲對岸舊名蒜山渡又
瓜洲渡在江都縣南四十五里瓜洲鎮與江南鎮江
相對江面十餘里此正予輩今日南北往來必由之
路若瓜步則在第二十五卷關津門云瓜步鎮在六
合縣東南二十五里瓜步山下是也自開邗溝江淮
已通而道猶淺狹六朝皆都建業南北往來以瓜步
就近爲便故不取邗溝與京口相對之路庾子山集
將命使北始渡瓜步江詩倪璠注隋志江都六合有
瓜步山述異記曰水際謂之步瓜步在吳中吳人賣
瓜於江畔因以名焉吳楚之間謂浦爲步語之訛耳

鮑照瓜步山楊文其略曰鮑子辭吳客楚指充歸揚
道出關津升高問途北眺氊鄉高曠炎國分風代川
揆氣閩澤卽此觀之則南北朝之以瓜步爲通津明
矣隋旣大開邗溝加濬深闊至唐皆南北混一無所
事於建業而都在關中自宜取邗溝路自江入淮自
淮入汴以沂河渭乃猶因循瓜步之舊直至齊澮始
改

伊婁之名今不稱未詳

澮雖改道却於京口遙領至大歷又改舊張延賞傳
代宗時爲揚州刺史淮南節度觀察等使邊江之瓜
洲舟航湊會而懸屬江南延賞奏請以江爲界人甚

爲便新書本傳亦載此事而改瓜洲爲瓜步新書好
改舊而多謬此其一也延賞以瓜洲本在江北而反
屬江南之潤州爲不便故請改屬江北揚州此與瓜
步何涉延誤直至今日尙有謂瓜洲爲瓜步者若舊
唐永王璘傳璘窺江左河北招討判官李銑在廣陵
麾下有騎一百八十遂率所領屯于揚子吳郡採訪
使李成式使判官評事裴茂以廣陵步卒三千同拒
于瓜步洲伊婁塽此云瓜步洲則步字乃衍文也張
祜瓜洲聞曉角詩五更人起煙霜靜一曲殘聲送落
潮其景色自與在六合者不同

史記秦始皇本紀三十七年始皇上會稽還過吳從江乘渡並海北至琅邪裴駟曰地理志丹陽有江乘縣張守節曰江乘故縣在潤州句容縣北六十里本秦舊縣也此秦時渡江之路江乘既在句容似非瓜步之在六合者 皇輿表第三卷江南布政使司江寧府六合縣在秦爲堂邑縣非江乘

三國魏志文帝紀黃初五年八月爲水軍親御龍舟循蔡穎浮淮幸壽春揚州界九月遂至廣陵六年八月以舟師自譙循洞入淮從陸道幸徐十月行幸廣陵故城臨江觀兵是歲大寒水道冰舟不得入江乃

引還曹丕之兩至廣陵不知何意孫權起事本在吳故其後建元國號吳建安十六年治秣陵改名建業二十五年都鄴改名武昌黃龍元年仍還建業當黃初五年六年權正在武昌丕之兩至廣陵殆以吳實權之根本重地欲乘虛襲之耶若果爾則當親率舟師以取潤常蘇一路計丕愚不至此况今鎮江江口入吳水道開于赤烏八年詳四十卷二黃初未有乎南齊書志云廣陵漢故王國有江都浦水魏文帝伐吳出此見江濤盛壯嘆曰天所以限南北也愚謂漢志江都渠水卽夫差邗溝疑亦卽今瓜洲南齊書志所云

江都浦水亦卽夫差邢溝疑亦卽今瓜洲曹丕不過
到此耀兵以警懼吳人耳若魏志所謂大寒舟不得
入江者必卽指瓜步在今六合者不旣耀兵或者從
此發想繞瓜步回遠六十里徑渡江窺建業或有此
事若謂卽欲從邗溝間渡因水冰始引還則斷無此
理蓋邗溝自隋始開通深淵然南北濟渡仍不取此
路仍行瓜步直至齊澠方改從瓜洲則曹魏時必不
發從此渡江之想

說已見第
五十八卷

通鑑第一百二十五卷宋文帝元嘉二十七年魏太
武帝太平真君十一年魏主引兵南下使尚書李孝

伯來謂張暢曰當自帥衆軍直造瓜步胡三省注瓜步山在秦郡尉氏縣界尉氏隋改爲六合縣南北對境圖曰今桃葉山卽瓜步鎮之地下文又云魏志至瓜步壞民廬舍爲筏聲言欲渡江建康震懼內外戒嚴命領軍將軍劉遵考等將兵分守津要遊邏上接于湖下至蔡洲陳艦列營周亘江濱自采石至干暨陽魏主鑿瓜步山爲蟠道於其上設旣屋元嘉二十八年正月朔魏主大會羣臣於瓜步山上班爵行賞有差其後以疾疫乃引歸考采石磯在今太平府當塗縣江濱暨陽今常州府江陰縣魏軍在瓜步而采

石在瓜步之上游暨陽則瓜步之下流五六百里間
如此備禦方爲完密耳王新城漁洋山人精華錄潤
州懷古詩黃鵠山頭寒雨暝佛狸帳外暮濤深黃鵠
山在鎮江府城西南三里出句用此對句若用隔岸
瓜洲事作偶始得斷無用六合縣境語之理然佛狸
魏太武小字設帳實在瓜步王亦誤認瓜步卽瓜洲
矣至瓜步旣可設帳大會必在江濱非江中山形亦
必廣大鮑照以爲江中眇小山此言未可泥鮑託物
寓意借此作感慨覩全文自明桃葉山者隋書五行
志云凜時江南盛歌王獻之桃葉詞曰桃葉復桃葉

渡江不用械但渡無所苦我自迎接汝及晉王伐陳始置營桃葉山下韓擒虎渡江大將任蠻奴至新林導北軍晉王營桃葉與太武駐瓜步情事正同然則桃葉山卽瓜步山也

劉遵考等分守津要自采石至暨陽事沈約宋書索虜傳詳述之云遵考與左軍將軍尹宏守橫江少府劉興祖守白下建威將軍黃門侍郎蕭元邕守裨洲羽林左監孟宗嗣守新洲上建武將軍秦容守新洲下征北中兵參軍事向柳守貴洲司馬到元度守蒜山時魏主在六合瓜步與南岸采石相對而橫江卽

采石也自橫江以下六地名皆自采石至今京口幾百里中地名也如以今瓜洲爲瓜步則與蒜山相對其上安得更容六地名哉

宋史第三百八十三卷虞允文傳紹興三十一年九月金主亮自將兵號百萬十月自渦口渡淮十一月壬申率大軍臨采石而別以兵爭瓜洲丙子允文至采石命諸將列大陣不動分戈船爲五部分畢亮麾數百艘絕江來薄宋軍允文率士殊死戰中流官軍亦以海船衝敵舟皆沉敵遁尾擊敗之亮怒乃趨瓜洲允文曰敵敗於采石將微幸於瓜洲今我精兵

聚京口持重待之可一戰而勝甲申至京口敵屯重
兵滁河造三暉儲水深數尺塞瓜洲口時楊存中成
閔邵宏淵諸軍皆聚京口不下二十萬淮海船不
滿百戈船半之允文謂數少不足以改修馬船爲戰
艦命張深守滁河口扼大江之衝以苗定駐下蜀爲
援庚寅亮至瓜洲允文與存中臨江按試命戰士踏
車船中流上下三周金山回轉如飛敵相顧駭愕一
將跪奏南軍有備願駐揚州徐圖進取亮杖之五十
乙未亮爲其下所殺丙申敵退此事有蹇駒所作采
石瓜洲樊亮記述之最詳蓋自隋以前使命往來及

北軍南征者皆出瓜步唐開元後移之瓜洲則瓜步之渡廢矣故亮兵至采石至瓜洲無所謂瓜步時宋高宗在臨安卽今杭州亮趨瓜洲者欲直取臨安也以上各條彙而觀之瓜洲瓜步兩地自明姜氏宸英湛園未定稿第五卷京口義渡贍產碑已考此事予又博證審訂之

今日行旅渡江又不復取瓜洲道從揚州而下至油閘口卽轉而南別有一小渡口出江亂流而過至京口此路去瓜洲亦不過五六里然瓜洲渡江與京口緊相對江面較直截小渡口反回遠而人皆取此道

者以瓜洲須穿城過河狹曲兩岸民居稠大船難行故也

丹陽縣取郡名

舊唐地志江南東道潤州丹陽漢曲阿縣屬會稽郡又改名雲陽後復爲曲阿天寶元年改爲丹陽縣取漢郡名考丹楊本郡名非縣名字从木不从臼自漢至南北朝所謂丹楊者今江寧寧國等府地唐誤楊爲陽既以潤州爲丹陽郡卽今鎮江府又改曲阿爲丹陽縣故曰縣取郡名與自漢至南北朝之丹楊大不同舊書此條極明江南通志第四卷溧陽縣改隸

鎮江府議云查縣誌漢時名永安隸丹陽郡至隋以後改隸江寧今丹陽現隸鎮江府則溧陽原係鎮江府舊屬攷漢志丹楊郡有溧陽無永安此誤以唐丹陽爲漢丹楊也

晉陵武進

新舊志常州屬縣皆首晉陵次武進晉陵爲州治不待言而舊志特於武進云垂拱二年置治於州內則知二縣並州治更分明愚謂地理沿革非圖表不顯宋咸淳四年四明史能之修毗陵志三十卷其卷首圖惜被妄人以明事攬雜而全書雖有闕尚可觀第

一卷郡縣表詳明確實最爲當家蓋建置之糾紛晉
陵武進爲甚考之令人目眩今得此可以無恨乃知
作者苦心良不易也萬斯同未見此書而所作表暗
與之合尤徵學識之精文多不錄二縣自唐歷五代
宋元恒爲郡治元混一方輿勝覽卷下江浙等處行
中書省江南浙東道肅政廉訪司下常州路縣名列
晉陵武晉者誤一字耳不足泥至明始并晉陵入武
進

故吳城

舊地志蘇州隋吳郡隋末陷賊武德四年平李子通

置蘇州六年又陷輔公祐七年平公祐復置蘇州都督蘇湖杭暨四州治於故吳城九年罷都督天寶元年改爲吳郡乾元元年復爲蘇州又云吳春秋時吳都闔閭邑漢爲吳縣隋平陳置蘇州取州西姑蘇山爲名案云故吳城又云春秋時吳都云云者卽今府城也而吳始都不在此其始築城亦不在此李吉甫元和郡縣志第二十五卷云蘇州吳郡周時爲吳國太伯初置城在今吳縣西北五十里至闔閭遷都于此陸廣微吳地記云泰伯奔吳爲王卒葬梅里至壽夢別築城於平門西北二里闔閭城周敬王六年

伍子胥築大城周回四十二里三十步小城八里二百六十步西闔胥二門南盤蛇二門東婁匠二門北齊平二門樂史太平寰宇記第九十一卷云太伯初適吳自號勾吳築城在平門外自太伯至王僚二十六王都之今無錫縣有吳城是也至闔廬西破楚入郢北威齊晉興伯名于諸侯築大小城都之今州城是也范成大吳郡志第三卷城郭篇云太伯城周三里二百步外郭三百餘步在西北隅名曰故吳又曰吳城在今梅里平墟人耕其中闔閭城吳王闔閭自梅里徙都卽今郡城四說大同小異朱長文吳郡圖

續記卷上封域篇說亦略同皆謂故吳城有二鄭虎臣吳都文粹卷一吳均吳城賦云古樹荒煙吳王所遷此則專指舊唐志所謂吳城

王存等元豐九域志第五卷平江府古跡羅城闕閣所築吳城伍子胥築此則不知如何分別存疑

吳地記又云隋文帝開皇九年改郡邑至橫山東新立城郭唐武德七年移新州却復舊址據此則隋又別築城於橫山東吳郡圖續記卷上城邑篇云隋開皇九年平陳江左亂十一年楊素帥師平之以蘇城嘗被圍非設險之地奏徙於右城西南橫山之東

范氏吳郡志第九卷古跡門云越公井在治平寺前
當橫山艮位隋開皇十年越國公楊素築城創斯井
時屯師孔多曰飲萬人蓋素旣平陳遷吳郡於山下
至今謂之新郭案此又一吳城也新郭距予居近予
嘗至其地仍有一聚落若元至正丁酉築城虎丘則
又一吳城朱竹垞考之已詳

蘇常戶口

常州天寶戶十萬二千六百三十一口六十九萬六
百七十三新同惟戶三十一作三十三蘇州天寶戶
七萬六千四百二十二口六十二萬二千六百五十

五新同惟口五十下無五字數目字易脫誤故小異耳但常州之編庶未必過蘇州常州新舊志領五縣同蘇州則舊志領六縣新志又多華亭一縣何以蘇多於常二縣而戶口反少於常至數萬乎蓋戶口之籍特憑此以出租庸調法不必覈實其造此籍出官吏手官或檢括嚴密則戶口多或欲優恤其民任聽容隱則戶口少故參差不齊新志於建置雖據天祐戶口仍據天寶故與舊志同也元和郡縣志蘇州開元戶六萬八千九十三與天寶相去無幾此爲近理其下又言元和戶十萬八百八籍固隨時而改矣新

志既據天寶故於後改略之

蘇州華亭縣新有舊無

舊志蘇州舊領縣四天寶領縣六一吳二嘉興三崑
山四常熟五長洲六海鹽新則縣七以長洲居嘉興
之前舊以置之先後爲次新以地之遠近爲次皆可
通但新則未多一華亭注云天寶十載析嘉興置舊
志據天寶十一載地理而不及此縣舊志訛脫舛謬
甚多當從新楊潛紹熙雲間志卷上封域篇云潛官奉議郎特差知秀州華亭縣主管勸農公事此書爲華亭一縣作建安二十四年封陸
遜爲華亭侯華亭之名始見吳志隋始置蘇州唐天

寶十年以華亭爲縣屬蘇州按新史寰宇記以爲本
嘉興縣地輿地廣志以爲本崑山縣地元和郡國圖
志云吳郡太守趙居貞奏割崑山嘉興海鹽三縣爲
之今邑四境與三縣接郡國圖志爲不誣矣楊潛所
考頗確新志云析嘉興者猶未備而舊志之闕漏顯
然

楊氏所引輿地廣志文今在歐陽忞
輿地廣記第二十三卷廣志卽廣記

雄升爲望

赤畿望緊等名郡與縣皆有之而郡則就郡別其等
縣則就縣別其等新志蘇州吳郡雄其屬縣凡四望
二緊一上歐陽忞輿地廣記第二十二卷兩浙路上

望平江府唐蘇州吳郡南唐升中吳軍節度皇朝太平興國三年改平江軍政和三年升平江府此自雄升爲望也郡雄縣有望可見郡縣不相應

草席鞶

新志蘇州土貢有草席鞶席字逗鞶字句鞶而徒以絲縷麻革爲之何獨吾吳有之樂史太平寰宇記第九十一卷蘇州土產有席又有草履可見席鞶二物皆以草爲之今吳出草席不待言而草鞶獨出嘉定一邑有黃黑二色精雅輕便最宜暑月蓋不但製法之妙此草亦他郡所無嘉定在唐崑山地也